

आकाशवाणी

खबरां नाट्यपाल सिंह कोला

1. राष्ट्रपति द्रौपदी मुर्मू होर अज्ज वीर बाल दिवस दे मौके पर प्रधानमंत्री राष्ट्रीय बाल पुरस्कार भेंट करडन।
2. प्रधानमंत्री नरेंद्र मोदी होर अज्ज नमी दिल्ली भारत मंडपमा च वीर बाल दिवस सरबन्धी राष्ट्रीय समारोह च हिस्सा लैडन।
3. केंद्रीय गृह मंत्री अमित शाह होर अज्ज नमी दिल्ली च आतंकवाद रोधी सम्मेलन दा उद्घाटन करडन।
4. दिल्ली च अटल कंटीन शुरू कीती गई ऐ जेदे च 5 रपे च रूटी उपलब्ध होग।
5. बंगलादेश दी साबका प्रधानमंत्री शेख हसीना होरें आखेआ जे मोहम्मद युनुस दी अगुवाई आहली अंतरिम सरकार बंगलादेश च गैर मुसलमानें खिलाफ बड़े मते अत्याचार करा'रदी ऐ।
6. ते महिला क्रिकेट च अज्ज संझा तिरुवंतपुरम च भारत ते श्रीलंका बश्कार त्रीया टी-20 अंतरराष्ट्रीय मैच खेडेआ जाहग।

<><><><><><>

Prez. Bal Divas

राष्ट्रपति द्रौपदी मुर्मू होर अज्ज नमी दिल्ली च वीर बाल दिवस दे मौके पर प्रधानमंत्री राष्ट्रीय बाल पुरस्कार भेंट करडन। महिला ते बाल विकास मंत्रालय नै आखेआ जे इस बारे 18 राज्यें ते केंद्र शासित राज्यें थमां 20 बच्चें गी वीर बाल पुरस्कार कन्नै सम्मानित कीता जाहग जिनें खेड, बहादुरी ते समाज सेवा दे क्षेत्र च शानदार उपलब्धियां हासल कीतियां न। इस समारोह दुरान सांस्कृतिक प्रस्तुतियां बी होंगन जेदे च मुख्य दी समृद्ध विरासत बारे दस्सेआ दसाया जाहग।

<><><><><><>

PM Veer Bal Divas

प्रधानमंत्री नरेंद्र मोदी होर अज्ज नमी दिल्ली भारत मंडपमा च वीर बाल दिवस सरबन्धी राष्ट्रीय प्रोग्राम च हिस्सा लैडन ते समारोह गी संबोधित करंगन। इस प्रोग्राम च प्रधानमंत्री राष्ट्रीय बाल पुरस्कार कन्नै सम्मानित बच्चे बी शामिल होडन। वी बाल दिवस गी गुरु गोबिंद सिंह जी हुंदे पुत्र साहिबजादे बाबा जोरावर सिंह जी ते बाबा फतेह

सिंह जी हुंदी बहादुरी ते शहादत दे चेते च मनाया जंदा ऐ। युवा अवस्था च उंदी शहादत, भारती इतिहास च अत्याचार दा अदम्य साहस कन्नै सामना करने दी अनौखी मिसाल ऐ।

<><><><><><>

PM-Govt. Working

प्रधानमंत्री नरेंद्र मोदी होरें आखेआ ऐ जे पिछले 11एं बरें सवां उंदी सरकार समाज दे हर इक नागरिक दी बेहतरी लेई मेहनत कन्नै कम्म करा करदी ऐ ते विजन फर्कौफर्की सभनें स्कीमें दा फायदा देआ करदी ऐ। प्रधानमंत्री होरें साबका प्रधानमंत्री अटल बिहारी बाजपेयी हुंदी 121मीं बरे गंड दे मौके पर राश्ट्री प्रेरणा स्थल दे उद्घाटन मगरा लखनऊ च इक रैली गी भाषण दिंदे होई एह गल्ल आक्खी। राश्ट्री प्रेरणा स्थल गी आजाद भारत दी महान हस्तियें दा सम्मान करने लेई बनाया गेआ ऐ। प्रधानमंत्री होरें आखेआ जे सरकारी योजनाएं दा शत-प्रतिशत फायदा पजाना उंदी सरकार दा मकसद ऐ ते हून करोड़ों बढे गरीब-गुरबे नागरिक इन्हे सवां फायदा हासल करा करदे न।

<><><><><><>

HM Anti Terror

केंद्री गृह मंत्री अमित शाह होर अज्ज नमीं दिल्ली च आतंकवाद रोधी सम्मेलन दा उद्घाटन करडन। गृह मंत्रालय नै आखेआ ऐ जे द'ऊं दिनें दे इस सम्मेलन दुरान सुरक्षाबल तकनीकी, कन्नूनी, फारेंसिक दे माहिर आतंकवाद कन्नै निबबड़ने ते राश्ट्री सुरक्षा कन्नै सरबन्धी कई मुद्दे पर चर्चा करडन। इस समारोह दा मुख उद्देश्य बक्ख-बक्ख सुरक्षा एजेंसिं ते मैहकमे बश्कार तालमेल गी स्थापित करना ऐ तां जे आतंकवाद दे खतरे कन्नै इकमुठ होइयै निबबड़ने च सखाल होई सकै। मंत्रालय नै आखेआ जे सम्मेलन दुरान विदेशी अधिकार क्षेत्रें थमां सबूत कट्ठा करने, डिजिटल फारेंसिक ते डाटा दा आंकलन करने, आतंकवाद रोधी जांच पड़ताल ते आतंकवाद कन्नै जुड़े दे नमें हाइब्रिड खतरें ज्नेह मुद्दे पर द'ऊं दिनें दे सम्मेलन दा आयोजन राश्ट्री पड़ताल एजेंसी एनआई करा'रदी ऐ।

<><><><><><>

Atal-Canteen

केंद्री मंत्री मनोहर लाल खट्टर ते दिल्ली दी मुखमंत्री रेखा गुप्ता होरें साबका प्रधानमंत्री अटल बिहारी बाजपेई हुंदी 101मीं जयंती दे मौके पर कल राश्ट्री राजधानी दिल्ली च अटल कंटीन शुरू कीती ऐं इस मौके पर पत्रकारें गी संबोधित करदे होई दिल्ली दी मुखमंत्री होरें इस योजना दी सराहना करदे होई आखेआ जे एहदे तैहत जरूरतमंद ते मजूर कम्मगारें गी 5 रपे च रूट्टी उपलब्ध होग। उनें जानकारी दिती जे अजें 45 कंटीनें गी शुरू कीता गेआ ऐ जदकि 55 कंटीनें गी अगले 15 दिनें तोड़ी शुरू करी दिता जाहग। तोआई, केंद्री मंत्री मनोहर लाल

होरें आखेआ जे इस पहलकदमी कन्नै लक्खें बद्दे लोकें गी फायदा होग। उन्नै आखेआ जे इस योजना कन्नै श्री अटल बिहारी बाजपेयी हुंदे उस सुखने गी पुर करने च मदद होग जेदे च कोई बी जना भुक्ख नेई होऐ।

<><><><><>

Bangladesh-Atrocities

बंगलादेश दियें साबका प्रधानमंत्री शेख हसीना होरें आखेआ ऐ जे मोहम्मद युनुस हंदी अंतरिम सरकार बांगलादेश च गैर मुसलमानें दे खलाफ बड़े अत्याचार करा करदी ऐ। 78एं बरें दी बरेसू दी अवामी लीग पार्टी दिएं लीडर शेख हसीना होरें एब्बी आखेआ जे मौजूदा हुकमरान समूह, जिन्नै गैर कन्नूनी तरीके कन्नै सत्ता पर कब्जा कीते दा ऐ, धार्मिक घट्ट गिनतरी आहले तबके दे लोकें गी बेरहमी कन्नै मारने दियां घटनां होआ करदियां न। उंदा इशारा पिछले हफ्ते बंगलादेश च इक हिंदू शख्स गी भीड़ आसेआ मारी कुट्टिये ओदी हत्या करी देने आहले पाससै हा।

<><><><><>

AI- Enabled Security Grid

पाकिस्तान आसेआ चलाए जा'रदे आतंकवाद करी पैदा खतरें गी घट्ट करने ते अंदरूनी सुरक्षा बवस्था गी होर निगगर बनाने दी कोशिश दे तैहत जम्मू-कश्मीर पुलसै भलेआं अज्जै-कल्लै दिएं स्हूलतें ते आर्टिफिशल इंटेलीजेंस कन्नै लैस इक सुरक्षा ग्रिड दा ऐलान कीता ऐ। आकाशवाणी दे जम्मू संवाददाता दी रिपोर्ट मुजब अगली पीढ़ी दी इस प्रणाली दे कन्नै समूलचे जम्मू-कश्मीर ते खास करियै बन्ने आहले ते संवेदनशील इलाकें च निगरानी, खुफिया जानकारीयां हासल करने ते तुरत कार्रवाई आहली बवस्था होर मजबूत होग। ध्यानजोग ऐ जे रायपुर च पिछले दिनें लाई गेदी पुलस बलें दे ड्रैक्टर जनरलें ते इंसपेक्टर जनरलें दी उच्ची सतह दी बैठक दरान इस पहलकदमी गी लागू करने पर सहमति बनी ही ते एह सुरक्षा तंत्र गी निगगर बनांदे होई भलेआं अज्जै-कल्लै दिएं तकनीकें दा इस्तेमाल करने दी सरकार दी बचनबद्धता गी दर्शादी ऐ।

<><><><><>

Women-Cricket

महिला क्रिकेट च अज्ज तिरुवंतपुरम दे ग्रीनफील्ड अंतरराष्ट्री स्टेडियम च भारत ते श्रीलंका दी टीम बश्कार त्रिया टी-20 मैच खेडेआ जाहग। एह मैच संझा 7 बजे शुरू होग। 5एं मैचें आहली श्रृंखला च भारती टीम नै 2-0 दी बढ़त हासल कीती दी ऐ। पैहले मैच च ऐतवारें भारत नै श्रीलंका गी 8एं विकटें कन्नै हराई दिता हा ते मंगलवार खेडे गेदे दुए मुकाबले च श्रीलंका गी 7एं विकटें कन्नै हराया हा।

<><><><><>

पाकिस्तान आहली बक्खी दा आतंकवादिएं दी घुसपैठ बारै थहोई दिएं खूफिया जानकारीएं दी बिनाह उप्पर सुरक्षाबलें जम्मू च अंतर्राष्ट्री बन्ने कन्नै लगदे इलाकें सने गवांडी पंजाब राज्य दे बन्ने आहले जिलें च बी सतर्कता बधाई दिती ऐ। आकाशवाणी दे जम्मू संवाददाता दी रिपोर्ट मूजब, जम्मू खिते दे जम्मू, सांबा ते कठुआ जिलें च सुरक्षा बवस्था निगगर करने दे कन्नो-कन्नी सीमा सुरक्षा बल - बीएसएफ आसेआ पंजाब दे बन्ने आहले इलाकें च बी सुरक्षा सरबंधी हीले निगगर करी दिती गे न। ध्यानजोग ऐ जे मौसम विभाग दी पेशगोई मूजब, अगले इक महीने धोहड़ी एकडे इलाकें च घनी धुंध दा पौना बरोबर जारी रेई सकदा ऐ जेहदी आइ च आतंकवादी, बन्ने पारा घुसपैठ दिआं भैड़ी कोशशां करी सकदे न। हासल होई दिएं खूफिया जानकारीएं मूजब, पाकिस्तान आहली बक्खी बैठे दे आतंकवादी, माड़े मौसमी हालात ते घनी धुंध दा फायदा ठोआंदे होई पंजाब दे बन्ने आहले इलाकें जि'आं पठानकोट ते गुरदासपुर थमां घुसपैठ करी सकदे न।

<><><><><><>

Read: Natyapaul Singh

D.E.O. : Varinder Kumar

Editor : Kunal Shrivatsa